

दिनांक 30.06.2024
समय: 18.45 बजे

आकाशवाणी जयपुर—अजमेर प्रादेशिक समाचार।

- प्रधानमंत्री नरेंद्र मोदी आकाशवाणी सूं मन की बात कार्यक्रम मांय आपरा विचार कर्या साझा—लोकसभा चुणाव मांय संविधान अर लोकतांत्रिक प्रणालियां मांय आपरा विश्वास दोहराणे खातिर देशवासियां रो जतायो आभार।
- प्रदेश मांय मुख्यमंत्री किसान सम्मान निधि योजना रो शुभारम्भ—65 लाख सूं बत्ती काश्तकारां रा खातां मांय पहुंची सम्मान निधि।
- मुख्यमंत्री भजन लाल शर्मा पल्स पोलियो दिवस साथे तीन स्वास्थ्य अभियानां रो कर्यो आगाज़—कयो, प्रदेशवासियां रे सेहतमंद होणे सूं स्वरथ राजस्थान रो संकल्प व्हेला साकार।

अर

- राज्य मांय न्यारी न्यारी ठोडां माथे मॉनसूनी बिरखा रो दौर जारी—पूर्वी राजस्थान रे केई ठोडां माथे कठी कठी घणी जोरदार बिरखा रा आसार।

0000

प्रधानमंत्री नरेंद्र मोदी लोकसभा चुणाव मांय संविधान अर देश री लोकतांत्रिक प्रणालियां मांय आपरो विश्वास दोहराणे खातिर देशवासियां रो आभार जतायो है। आज आकाशवाणी सूं मन की बात कार्यक्रम मांय प्रधानमंत्री देशवासियां सूं कयो कि 2024 रो आम चुणाव दुनिया रो सब सूं बड़ो चुणाव हो।

प्रधानमंत्री 30 जून रे दिन रो महतव बताता थकां कयो कि आज रो दिन म्हाणा आदिवासी भाई—बहन 'हूल दिवस' रे रूप मांय मनावे है। ओ दिन वीर सिद्धो कान्हू रे अदम्य साहस सूं जुड़यो है अर झारखंड रा आं सपूतां रो सर्वोच्च बलिदान आज भी लोगों ने प्रेरित करे है। प्रधानमंत्री विश्व पर्यावरण दिवस माथे इण बरस सर्व कर्या गया खास अभियान — 'एक पेड़ माँ के नाम' रो जिकर कर्यो।

प्रधानमंत्री कयो कि लारला दशक रे चालता भारत मांय वन खेतर रो घणो विस्तार व्हयो है अर अमृत महोत्सव रे चालता देशभर मांय 60 हजार सूं बत्ती अमृत सरोवर भी बणाया गया।

प्रधानमंत्री मोदी कयो कि कुवैत सरकार आपरे राष्ट्रीय रेडियो माथे हिंदी मांय एक खास कार्यक्रम सर्व कर्यो है। इण पहल खातिर वणा कुवैत सरकार अर वठे रा लोगां ने धन्यवाद दियो। प्रधानमंत्री कयो कि आगले म्हीने इण बखत तांई पेरिस ओलंपिक सर्व हो चुक्या व्हेला। वणा ओलंपिक खेलां खातिर भारतीय दल ने शुभकामनावां दी। प्रधानमंत्री ने आकाशवाणी पिरिवार ने भी बधाई दी क्योंकि आकाशवाणी रो संस्कृत बुलेटिन आज आपरे प्रसारण रा 50 बरस पूरा कर लिया है।

प्रधानमंत्री कयो कि संस्कृत री प्राचीन भारतीय ज्ञान अर विज्ञान री प्रगति मांय मोटी भूमिका री है। श्री मोदी कयो कि एक सप्ताह रे पाछे पवित्र रथयात्रा सर्व होणे जा री है। वणा कामना करी कि महाप्रभु जगन्नाथ री कृपा सगळा देशवासियां माथे बणी रहवे। वणा

अमरनाथ यात्रा अर पंढरपुर वारी रो भी जिकर कर्यो अर आं जातरावां मांय भेळा होवण वाळा सगळा श्रिद्वालुआं ने शुभकामनावां दी।

सूचना अर प्रसारण राज्य मंत्री डॉ. एल. मुरुगन कयो है कि प्रधानमंत्री नरेन्द्र मोदी आम चुणाव रे पाछे मन की बात कार्यक्रम मांय लोगां सूं मॉ रे सम्मान मांय पेड़ लगा र पर्यावरण री रक्षा करणे री अरज करी है जको एक बड़ो कदम है अर युवा पीढी ने इण सूं प्रेरणा मिलेली।

प्रदेश मांय भी मन की बात कार्यक्रम ने ले र आमजन मांय अर भाजपा कार्यकर्तावां मांय खासो उच्छास निजर आयो। मुख्यमंत्री भजन लाल शर्मा आज मुख्यमंत्री निवास माथे आमजन रे साथे साथे मन की बात कार्यक्रम ने सुण्यो। वणा प्रदेशवासियां सूं अपील करी कि प्रधानमंत्री नरेन्द्र मोदी कानी ऊं सरु कर्या गया 'एक पेड़ मां के नाम' अभियान रे तहत बत्ती सूं बत्ती तादाद मांय पेड़ लगाया। पाली मांय मन की बात कार्यक्रम री 111वीं कडी ने सुणने खातिर भाजपा अल्पसंख्यक मोर्चा रा कार्यकर्ता जुट्या। इण मौके माथे कार्यकर्तावां ने केन्द्र अर राज्य सरकार री योजनावां ने जन जन ताईं पहुंचाणे रो संकल्प लियो। वठी ने सवाईमाधोपुर अर कोटा मांय भी मन की बात कार्यक्रम ने सुण्यो गयो। बीकानेर रा 178 शक्ति केन्द्रां माथे मन की बात कार्यक्रम सुण्यो गयो।

0000

मुख्यमंत्री भजन लाल शर्मा आज काश्तकारां खातिर **मुख्यमंत्री किसान सम्मान निधि योजना** रो शुभारम्भ करयो। टोंक मांय राख्यी ज्या राज्य स्तरीय जळसा मांय मुख्यमंत्री योजना री पैली किश्त रा रूप मांय 6 सौ 50 करोड़ रुपया री रकम 65 लाख काश्तकारां रा खातां मांय पूगायी। इण मौके माथे श्री शर्मा कयो कि काश्तकारां रे कल्याण खातिर सरकार हर संभव कदम उठावेली।

कार्यक्रम मांय जिला रा प्रभारी मंत्री हीरालाल नागर, कृषि मंत्री किरोड़ी लाल मीणा, जलदाय मंत्री कन्हैया लाल चौधरी अर सहकारिता मंत्री गौतम कुमार दक भी मौजूद रिया। राज्य रा न्यारा

न्यारा जिला मुख्यालयां माथे भी किसान सम्मान निधि योजना रे तहत कार्यक्रम राख्या गया। इण रे चालता मुख्यमंत्री न्यारा न्यारा जिलां रा काश्तकारां सूं वर्चुअली संवाद कर्यो। दौसा मांय जिलास्तरीय कार्यक्रम मांय उद्योग मंत्री राज्यवद्धन सिंह राठौड़ मौजूद रिया। वठी ने डूंगरपुर मांय विजयाराजे सिंधिया ऑफिटोरियम मांय जिलास्तरीय कार्यक्रम मांय मौजूद किसान अहलकार अर जनप्रतिनिधि वर्चुअल रूप सूं राज्य स्तरीय कार्यक्रम सूं जुड्या। मुख्यमंत्री डूंगरपुर रा एक किसान सूं वर्चुअली बणतल भी करी। ध्यानजोग है कि योजना रे तैत काश्तकारां री कृषि संबंधी जरूरतां ने ध्यान मांय राखता थकां वा ने हर साल 2000 रुपया री अलग सूं रकम देणे रो राज्य सरकार फैसलो लियो है।

000

.....
000

मुख्यमंत्री भजन लाल शर्मा आज जयपुर मांय चिकित्सा महकमा रा तीन अभियानां रो शुभारम्भ करयो। वणा पोलियो दिवस रे मौके माथे 5 बरस तांई रा टाबरां ने पल्स पोलियो री खुराक पिला र प्रदेश मांय ‘राष्ट्रीय पल्स पोलियो अभियान’ री सरुआत करी। वणा ‘स्टॉप डायरिया अभियान—2024’ अर आयुष्मान भारत डिजिटल मिशन रे तहत ‘आभा आईडी बनाओ’ अभियान री भी शुरुआत करी। इण मौके माथे मुख्यमंत्री अर चिकित्सा मंत्री गजेन्द्र सिंह खींवसर तीन्यू अभियानां रा पोस्टर्स रो विमोचन कर लाभार्थियां आभा आईडी कार्ड प्रदान करया अर टाबरां ने ओआरएस रा पैकेट अर जिंक री गोळियां बाटी। श्री शर्मा कयो कि प्रदेशवासियां ने उच्च गुणवत्तापूर्ण स्वास्थ्य सेवावां मुहैया करवाणो राज्य सरकार री प्रतिबद्धता है।

000

राष्ट्रीय पल्स पोलियो अभियान रे तहत प्रदेश मांय आज 5 साल तांई रा टाबरां ने पोलियो रोधी दवा पिलायी ज्यी। अभियान रे तहत राज्यभर मांय एक करोड़ सूं बत्ती टाबरां ने दवा पिलाणे रे लखस राख्यो गयो है। इण रे खातिर साढे 61 हजार बूथ बनाणा गया है। इण काम खातिर 77 हजार 500 सूं बत्ती टीमां लगायी है। प्रदेश मांय अभियान री सरुआत मुख्यमंत्री भजन लाल शर्मा मुख्यमंत्री आवास सूं करी। ज़िला मुख्यालयां माथे पोलियो रोधी दवा देणे खातिर खास

इन्तजाम करया ग्या है। पाली जिला मांय पल्स पोलियो टीकाकरण अभियान रो आगाज कैबिनेट मंत्री जोराराम कुमावत सुमेरपुर रे राजकीय सामुदायिक स्वास्थ्य केंद्र मांय बणाया गया पोलियो बूथ सूं कर्यो। बूंदी जिला मांय पल्स पोलियो अभियान रे तैत आज 749 बूथां माथे पात्र टाबरां ने पोलियो री खुराक पिलाई। केकड़ी जिला मांय अभियान री सरुआत विधायक शत्रुघ्न गौतम करी। झुंझुनूं जिला मांय 1372 बूथां माथे टाबरां ने पोलियो रोधी दवा पिलाई ज्यी।

बांसवाड़ा जिला मांय अभियान री सरुआत आयुष्मान आरोग्य मंदिर खाटू कॉलोनी मांय जिला कलेक्टर पात्र टाबरां ने दवा पिला र करी। डूंगरपुर मांय भी अभियान रे तहत टाबरां ने पोलियो रोधी दवा पिलाई। अभियान रे तहत आज बूथ माथे पोलियो री खुराक पीणे सूं वंचित रिया टाबरां ने आगला दो दिन घर-घर जा र दवा पिलाई जावेला।

000

प्रदेश मांय न्यारी न्यारी ठोडां माथे मॉनसूनी बिरखा रो दौर जारी है। उदयपुर मांय आज दिनभर रुक-रुक र बरसात रो दौर चालतो रियो। वठी ने राजधानी जयपुर रा केई खेतरां मांय जोरदार बिरखा व्ही, जिण सूं सड़कां अर नीचला इलाकां मांय पाणी भर ग्यो। चूरु अर भीलवाड़ा मांय भी हल्की बिरखा व्ही। बीत्या 24 घंटां मांय राज्य रा पूर्वी हलकां मांय कठी-कठी तेज अर घणी भारी बिरखा दर्ज करीजी है। मौसम केन्द्र जयपुर रे मुजब प्रदेश मांय सबसूं बत्ती 124 मिलीमीटर बिरखा धौलपुर जिला रे बाड़ी मांय दरज करीजी। डीग जिला मांय व्ही चोखी बिरखा सूं कामां मांय 28 बरस बाद सबलाना बांध सूं पाणी पहुंच्यो है। इण सूं काश्तकारां मांय घणो खुशी रो माहौल है। मौसम केन्द्र रे मुजब आज जयपुर, भरतपुर, कोटा, अजमेर अर उदयपुर संभाग रा कुछ हिस्सां मांय बादल गर्जणे रे साथे बिरखा होणे री आस है। वठी ने पूर्वी राजस्थान री केई ठोडां माथे कठी कठी भारी बिरखा होणे रा आसार है।

000